

李文忠公朋僚函稿

李文忠公朋僚函稿篇目

桐城吳汝綸編輯

卷第十九

正月十七日致沈幼丹制軍

光緒三年

正月二十二日復區海峯容純甫

光緒三年

三月十三日致沈幼丹制軍

光緒三年

三月二十日復船政吳春帆京卿

光緒三年

三月二十一日復丁雨生中丞

光緒三年

三月二十六日復郭筠仙欽使

光緒三年

四月二日復郭筠仙欽使

光緒三年

四月二十八日復吳春帆京卿

光緒三年

端午日復沈幼丹制軍

光緒三年

五月十九日復劉仲良中丞

光緒三年

五月二十一日復丁兩生中丞

光緒三年

六月朔日復郭筠仙星使

光緒三年

六月十三日復周筱棠京卿

光緒三年

六月十四日復沈幼丹制軍

光緒三年

七月五日復曾沅甫宮保

光緒三年

七月十一日復何筱宋制軍

光緒三年

七月十八日復郭筠仙星使

光緒三年

七月二十六日復沈幼丹制軍

光緒三年

中秋夜復吳春帆京卿

光緒三年

八月二十四日復周筱棠京卿

光緒三年

八月二十七日復曾劼剛京卿

光緒三年

八月二十八日復曾沅甫宮保

光緒三年

九月三日復吳春帆京卿

光緒三年

九月六日復丁雨生中丞

光緒三年

九月十六日復沈幼丹制軍

光緒三年

九月十七日復曾沅甫宮保

光緒三年

九月二十五日復曾沅甫宮保

光緒三年

十月朔日復沈幼丹制軍

光緒三年

十月四日復郭筠仙欽使

光緒三年

十月二十一日復沈幼丹制軍

光緒三年

十月二十二日復吳春帆京卿

光緒三年

十月二十四日復曾沅甫宮保

光緒三年

十月二十八日復曾沅甫宮保

光緒三年

十一月二日復榮侍郎

光緒三年

十一月四日復郭筠仙星使

光緒三年

十一月十二日復丁稚璜宮保

光緒三年

十一月十三日復曾沅甫宮保

光緒三年

復李子和河帥

十一月十四日復文式巖中丞

光緒三年

長至日復熱河延都護

光緒三年

十一月二十日復船政吳春帆京卿

光緒三年

十一月二十二日復兼署豫撫李子和河帥

光緒三年

十一月二十四日致閩丹初侍郎

光緒三年

十一月二十五日復沈幼丹制軍

光緒三年

十二月八日復陳俊臣廉訪

光緒三年

十二月十三日復閻丹初侍郎

光緒三年

十二月十四日復桂司馬本誠張大令彭齡

光緒三年

十二月二十二日致洪觀察

光緒三年

李文忠公朋僚函稿卷第十九篇目終

李文忠公朋僚函稿卷第十九

桐城吳汝綸編輯

正月十七日致沈幼丹制軍

光緒三年

朝廷倚公爲東南柱石喘疾卽不能驟愈亦欲以臥治保障況春氣融和自漸痊復幸勿堅持初志久假不銷致煩宸廑而負民望招商局買併旗昌股分迭經咨復旋奉寄諭竊謂當世無此風力但冀在事諸人稟承蓋略善持其後河運改海僅就局員原稟咨請總署轉商農部乃惹出諸多議論江都一生經濟惟力主江北十萬石河運而已長江六處停泊章程言人人殊幾如築室道謀惟卓論與九江沈道續議切中事理簡當可行未知總署如何核定已據鄙見轉陳災民分廠賑濟籌辦極爲盡心是以感召天和祥雲迭沛欽感奚似臺事昨始議覆與尊疏大意略同彼陽請改爲臺灣巡撫凡與兩生齟齬者皆附和之爲一時計固非妥策爲

百年計更非常局不敢不引伸及之以待 廷臣決議西班牙虛聲恫喝各國皆不謂然當有善處之法梓芳函告建平案結極爲平允何患遠言滙道何人接署諒已定局盛軍營勇爲哥會勾引潰去二百餘人幸卽剿除亦由餉絀所致

正月二十二日復區海峯容純甫

近來學生造詣有諸君認真督率自當進而益上其選入大書院者能否令其各習一藝中國所亟宜講求者煤鐵五金之礦未得洋法則地寶不出現在臺灣湖北等處開煤所請英人高下不等所用機器原委難明其餘各省因無人指授不免觀望如出洋學生內有願異可造之才望送入礦務學堂先窮究其理器一二年後再令游覽美國五金礦所或暫充工役或隨同研究必自能辨識地產之有無厚薄機器之如何用法融會貫通可得上等考單確有把握然後遣回再發往各省礦局試用庶於國計

有裨于新留意純甫所薦黎約翰水雷去冬經唐景星與之議訂大略本年諒必送來試驗惟各國洋人頗多訾議或謂價值太昂或謂並非新式利器應俟演放後察奪辦理惟埃及並他國買此雷者究竟實價若干仍祈查訪明確由電報寄招商局以便考核至要至盼蒞秋太常有三月間出京之說西班牙公使以新議古巴章程未定欲調兵船來華脅制尙在混攪星使須先赴美國籌辦一切華盛頓派員至金山查辦華工事宜聞西三月可定議所有外國緊要新聞及學生情形希隨時詳晰示知以慰遠念

三月十三日致沈幼丹制軍

惠書改擬沿江六處補釐減釐之法簡要詳明曷任欣佩比赫德稅司謁商計已面商定妥惟總稅司於釐卡向不謂然又意存含混不欲苦心分明恐所議無成仍取決於總署則藉以宕緩開辦之期在我固未失算英

使或不致責言耶昨又奉二月二十六日手示知已力疾銷假惟氣喘無
眠尙未甚減春暖氣和喘嗽定可漸止 內意必不肯釋手似祇能以武
鄉盡瘁爲期臥治更不待言矣不才閭弱未敢言退然每羨人之勇退公
則欲退不能莫如不必言退更爲直捷卓見以爲何如彼宋致召民書深
怨兩生祇知有己不知有人兩生去志益決接總署議復臺餉之疏稍爲
有著未識幡然變計否俊侯赴任固係正辦所請選帶數營似未知箇中
爲難情形大枝勁旅全賴主將得人俊去竟無能替分統者將與兵既不
可分調餉尤未能分撥弟未奉 旨不便與議若以數營應調求由閩中
籌支否則徑由尊處飭撥蘇局釐金若干斷不可令揚臺遠解也漚道以
芝田兼署交涉公事較熟仁山爲餉源日拙擬卽赴津籌商當預擇會辦
之人將來如有量移便易脫卸仲弢回津後屢請續假其意亦不欲南行
耳

三月二十日復船政吳春帆京卿

永保在津因船舵損壞修理逾月今始告蕺飭解礮船餉銀一萬兩回閩
克鹿卜四磅礮已發各營操練礙難撥回幸呂宋尙無兵船來華臺防訂
購新礮剋期可至亦無須借用致將來撥還多一周折也日李帶學生於
二十二日由香港搭船出洋似可由尊處主稿會奏何必拘泥大杏尙未
奉到實亦無從核辦筠仙燈節來信謂正月初五金登幹邀往海口驗試
新造三十八噸礮船二隻一名麻甲英官浪爲美管帶一名阿刺塔英官
靜樂林管帶運用機器輕便靈妙詢之海部侍郎司久阿云英人數年內
始得汽機放礮之法現造礮船尙未通行船身鐵厚不逮五分意嫌其薄
然礮固中土所絕無者赫德云四月杪必到閩屆時乞妥細驗收兩生嫌
邱千總軟弱鄙見略同管帶巨礮行大洋風浪中不至貽誤否望再與兩
帥暨吳世忠等認真考訂管帶責任甚重誠不可輕以嘗試至應留洋弁

與否應調換弁兵之處并求主裁仍飭歸隊操練月餘如臺洋無警即飭該四船結伴北來爲幸彼兩二公意見參差皆爲公事召民面稱閩中司道稟請兩帥回省會商自易融洽兩帥能卽內渡否總署戶部議覆臺餉分撥南洋海防額款號稱歲二百萬每年實解不過四十萬指作開礦鐵路募墾等經費不敷尙鉅其軍餉及購辦礮械八十萬若能截留閩省京協各餉庶少寬展購中號鐵甲船二隻總須二百萬以外部議卽准借洋債祇能在海關應撥四成防餉內按年扣還寅支卯糧則海防額餉更無可恃矣見在定議若何便希詳示李勉林有告退之意玉軒覓難離局金陵機器局務較簡但未用洋匠全賴龔仰蓮有三分內行指揮調度劉治卿人甚懷懂管局十年祇知賺錢不解製造未便復用

三月二十一日復丁兩生中丞

迭閱筱帥致召民函情詞悌鬱頗怪執事莫知我艱筱濤赴省稟商當漸

融洽春帆絳告已允截留閩餉接濟臺防並可商借洋債似尙實心幫助
顧全大局昨准總署咨臺灣巡撫業已議駁具見 中朝倚畀甚殷台端
無可求退之理似仍如鄙論鞠躬盡瘁爲是聞司道公稟額請騶從回省
會商一切彼帥局量雖似彌急而心地極厚性情率真本係同鄉一經面
晤無不能通商者臺地各務尙未開辦或可抽暇旋省耶部署皆不以借
洋債爲然惟開辦鐵路定購鐵船一時斷難有此巨款或者通融准行惟
各關無力分年認還當於南洋海防應撥四成半分之半項下按結抵扣
爲數無幾若僅借二百萬分十年歸楚尙不至誤但此後解款愈少幸預
籌之各國電報俄與土耳其其弊端已開歐洲戰爭方始日本薩桐馬之亂
尙無了期乘此東西洋多事無暇旁顧中土厲兵練甲事有可爲全賴閣
下提綱挈領振此頹風不才老憊引領企之鍾西耘留館後當仍回臺襄
助

復何後宋制軍

臺防爲閩厦屏蔽兩生力疾經營諸廢並舉初調勇營輪船藉壯聲勢固
懾於赫德呂宋之虛報至今並無兵船入境臺中可從容籌布閩省尤應
鎮靜無爭唐俊侯帶隊赴任自係正辦惟所統馬步二十營無人接替兵
分則單餉分則竭幼丹來信極爲躊躇聞已另撥他營應命矣召民高掌
遠賊欲圖脫卸津關歸謀宏遠公司出洋之事雅不願再就羈勒滬上機
器局本非李勉林所能獨任勉林又懷去志玉軒未便一日遠離況玉軒
尙係候選知府升用道員調閩須加捐過班留省小就亦非樂爲頃春帆
復以尊意相屬顧念局務之重人才之艱不得不繫維朝夕徐待機緣耳
閩省洋務除教案應由地方官妥辦其餘交涉尙非甚繁向來當有熟手
或無須異地求才

三月二十六日復郭筠仙欽使

閱新聞紙知已順抵倫敦覲見英主總署鈔寄行海日記一本循覽再四
議論事實多未經人道者如置身紅海歐洲間一拓眼界也補頌駐紮國
書另發文憑一節總署如何議復尙未得信昨准杏雲生京卿已奉 上
諭賞加二品頂戴改爲德國 欽差大臣從此裁去副使名目而藉聯德
國之交實屬一舉兩得惟執事久駐英都之局亦定一時恐乏替人異方
風景殊令人增切怛耳胡筱泉爲餘杭命案奪職執事坐補少司馬差強
人意數萬里苦役擔當 國是僅以此酬庸猶未慳也十年脩約一條遠
欲除去本辦不到威使函內語意尙順其云中國固遵和約條款辦事可
免重脩不論何時中國則可直謂不必重修似頗嶄截若慮煙臺定約甫
經開辦再過一年又值修約之期同治八年議修未成遂作罷論卽再屆
期斷無逼迫紛更之理但未便明刪此條耳德俄修約雖欲添改多條究
亦尙無定論卽令英國廢此條而各國未必皆廢此條存之不過多費脣

舌若無他蚌豈能因此逼迫耶新嘉坡等處設立領事閱鈔致胡璇澤信已照會外務府如何照覆華民身格年貌紙筆費似祇能酌收一次抵作領事常年費用恐尙不敷由公使賂助公款亦非常局想已緘商總署未稔如何定章弟曾略致此意亦未詳覆小呂宋噶羅巴屬日葡諸國應由總署與日使商辦葡國并未立約更無從商胡璇澤恐力難兼管亦非駐英使臣所能遙制但可先設新嘉坡一二處樹之風聲收拾人心他處再逐漸察度試辦方有次第卞長勝等弁兵七人派赴德國學習武藝已鈔全案交李丹崖觀察帶去奏明飭令每三月赴德查察一次先是德使巴蘭德轉致伊兄巴總兵代爲照料嗣據巴使等來信謂卞長勝王得勝朱耀采三人不守營規由原帶之李勵協安置博洪廠學習製造機器仍留四人在斯邦達軍營學藝頗有進境迭據卞長勝等稟報在廠止充工役爲李勵協所屈抑而李勵協於年底回華昨來津面陳卞長勝性傲朱耀

采浮華實不堪造就諄請調回中國鴻章方密屬李丹崖於抵英法安置水師學生之後馳往博洪廠斯邦達等處察看商辦備卞長勝等尙知愧奮可望學技有成或博洪廠大小主客難諧卽調伊等至德國克羅卜大廠學習鑄造後門鋼礮克鹿卜與敝處多年主顧情誼甚厚聞該廠現有華人及日本人各一名學藝頗精聲氣不孤如卞長勝等無志向上述糜經費卽由丹崖稟明飭調回華茲蒙檄委德員外赴德國詳悉考察具仰培植人才不分畛域之盛意感佩莫名德君想久回英應如何妥辦之法計有續報在途李丹崖與日意格於二月二十一日帶閩廠學生由香港起程先至法國後往英都一切當就近稟商辦理將來雲生星使移駐伯靈亦乞轉託妥爲照料是幸西洋水陸兵法及學堂造就人材之道條理精嚴迥非中土所及弟前派卞長勝等數人前往小試其端具有遠謀迭致總署概置不理卽去冬會奏遴派水師學生赴英法請總署照會各公

使至今未見照會照覆文稿堂司各官於此等要事觀如隔膜壹意敷衍洋人甘受斥辱可嘆亦可怪也福興輪船賠款據招商局稟報業經辦結照原斷付給自不便再與申論租界免釐已於新正月初一日開辦宜昌溫州蕪湖北海等口亦於二月十八日開辦長江停泊六處章程未定俟赫德與幼丹議明再行定期是煙臺約款所增大致已經開辦英國斷不得再有異議洋藥在新關併征釐稅各國均未照覆似俟英廷議准英人方懼洋藥滯銷印度餉絀加釐尙難遽允停運更難遵行惟此件是該國極無情理之事各國皆不謂然既有教會及粵紳公稟禁遏似不妨乘機爲外部言之妥籌漸禁漸絕之法如果英商肯卽停販中土應卽禁種禁食否則禁令有所不行矣旗式一節尙由船政核定尖角係循照軍營舊例誠不如長方式之大雅黃色係由總署核定以 國家尙黃恐難更易金登幹代辦礮船約四月間到閩交吳春帆驗收兩生因日國有調兵船來

華之說趕辦臺防遂將該四船調去

再聞粵人伍秩庸學習英律甚爲精熟陳荔秋欲派充秘魯國總領事設法招致而執事左右竟乏此才殊爲可惜李丹崖帶去學生中通習英文能繙譯漢文者當能通融擇用大都英文專精已難兼譯漢文者更少容爲留意荔秋夏間當可出都日本薩司馬民亂何如璋等一時似難前去俄土兵端已開歐洲大局頗有震驚目下情形若何便希詳示尊府訟事雙石年底來函議由貴族人自行理處家兄二月初回任後又緘屬雙帥勿稍偏抑能調昌猷回湘議結爲妥昨弟又將燈節來信轉寄彼兄卽未便過問亦必籌所以善處之方幸勿以此拂鬱致傷旅懷爲要

四月二日復郭筠仙欽使

德副郎往德國查明卞長勝等三人尙肯發憤自效乃與其兵部水部師大臣商議改派水師學習已由尊處函屬石多士照辦并將各弁用款提

歸巴提督經理多羅塔教練有成允給寶星以爲榮寵具仰措置得宜感佩無既前擬調卞長勝等赴克鹿卜廠學習係不得已之計卞王本徐鎮水師營哨弁又德國兵船嚴整不亞於英弟前在大沽煙臺兩次閱操深爲歆慕目今兵船人才尤乏該弁等如肯苦心研求將來回華必有大用現入學堂抑上練船乞屬李丹崖赴德時查察妥辦爲幸附致丹崖函希轉交閩廠學生至倫敦者如何分派學藝全仗大力商辦夏弗斯等禁煙公會謂必禁鴉片乃能永敦和好正須兩國合謀實爲中肯上下議院公論若何該國執政能否歆動大疏尙未准總署咨照必須彼此熟商安定漸除漸禁之策若先令中土禁種禁食而外洋販運日廣是爲叢驅爵非平恕之道勢亦有所不行卽如各口洋稅歲共千餘萬洋藥稅居四分之一加以內地捐釐約二三百萬若中外合禁棄此數百萬尙爲有益民生若我徒禁種禁食而不禁外來固非政體亦損國計卓裁以爲何如致

總署書辦張自牧事及奏昌猷訟案不平之鳴委曲詳盡既投畀七萬里以外旁人猶如此下石尙復何所顧忌竊料必有 廷寄交湘撫查覆執事惟有度外置之幸勿告歸當軸力庇瑯琊不過 賜環少遲耳

四月二十八日復吳春帆京卿

省齋方伯展 覲回津云聞 樞廷議論兩帥雖允暫假決不允其乞退似執事赴臺必非常局無待旁人之僥言惟當節候炎蒸觸冒瘴癘固知吉人自有天相尤盼靜攝以護起居日國商船一案派員來華商辦既有葉虎等稟結爲證景星赴厦與該領事議明辦法卽未必剋期速結而輒磨堅抵自能漸就範圍不至再興風浪台端臨以鎮靜諸務悉照舊章仍如尊示一月內外籲懇回工以免兩誤爲是屆期兩帥當亦痊愈卽不肯銷假 廷旨必彊起之也聞省協餉一概停緩斷做不到卽如新疆進兵正在得手羽檄催提急如星火豈容藉詞延擱在臺言臺謂須專顧樞部

方以另撥海防之款相搪塞不問各省關解與不解且並不分別舊撥兵餉新撥爲鐵路開礦等用也尊論臺防斟酌裁營方能持久極爲至當不易之理望與兩生詳妥籌商免因此事圍牆生蚌終於大局無裨彼兩二公性情諒難十分融洽然兩帥建議閩遠任事精果實一時傑出之才閩臺皆不可少此人但略存怨道分定界畫或亦可以久處英國續購礮船計已到閩赫德由香港回曾過閩接晤否執事移臺後如何驗收措置深系鄙懷鄧世昌李和邱寶仁吳夢良應否派令分帶均乞酌辦咨照備案威遠船暨派張成管駕自非得已將來四礮船北旋務祈仍飭張成帶來其才加以歷練似可膺統帶之任若分帶合操散而無紀似難得力大礮實心子當易仿製赫德代買每礮五百子一時恐難運到容屬獻夫等留心籌備礮子過大本不能甚準但此礮與船關鍵相連自非常操不能精熟李丹崖至英法後有無續報俄土戰事似將中輟俄船決不敢與英交

仗若藉觀其陸戰亦令學生練勝練技矣仲說本不願南行弟亦未稍催促聞 樞廷猶以違 旨赴差爲正辦節後當附輪前往投閒置散乃分之宜惟尤可不必避賢路也

端午日復沈幼丹制軍

沿江五處停泊章程尙未見尊處及總署咨行既訂五月二十一日開辦豈猶可緩展耶美國西使爲高橋輪船等案與總署往復駁辨迄無頭緒前接總署函已請執事俟何天爵到甯商議辦理諒已轉飭滙道設法安結該使所欲甚奢總署雖說明此是了案並非還債然不還債亦不能了案弟曾憶同治四五年應敏齋議辦此案謂高橋輪船不略予賠償終難結局彼時卽有索賠三萬之說因楊道已故吳道不肯認遂爾因循不料至今仍糾纏不已致煩蓋慮究應如何設法如何定數高明自有權衡乞隨時詳示爲幸兩生內渡復聞已有 旨令春帆覓往接辦春翁決非久

局兩帥亦不得卸肩第與彼帥外和內介閩餉尤難周轉竟無善處之方
景星已由閩赴港臺約定夏間回滬招商局責任甚重未可久離玉軒機
器熟手則更無人能替也筱軒俟侯仁山南旋屬爲代商大略餉事竭蹶
至此秋後幸得豐稔各軍當酌裁一一營期稍節流皖廬未得透兩秧未
全插又有飛蝗股憂啓聖其何以恤此疲屯耶淮商包完川鄂釐餉是否
確有把握事關全局利害尙乞審慎行之

正封緘間又奉四月二十四日賜緘以六處裝船須到第一關完稅之貨
必令該商派人押送等因所議極爲周密各處經派稽守前往逐細商訂
辦理可期畫一計期已近望及早奏咨定案爲荷

五月十九日復劉仲良中丞

皖吳皆告旱蝗轄境兩陽獨順或者恐懼脩省感召天和錫春圃虧項能
提熬免案內已交之款以補故員有因之虧斯爲幹旋妙用望催藩司趕

爲清結五處起卸新章幼帥費盡氣力英使突出挑剔謂不與會商不能轉行照辦蓋赫德食中國之祿姑徇我意而非各國免釐本心將來尙有許多口舌湖口經九江洋行求緩品蓮陔愚竟有機權賢者固不可測也津滬機器局巨費在各國視若毫芒近日粵東山左湖南踵行之各沾沾自喜坐井而不知天大莫如併歸一局分濟各省或可擴充以抵西洋之一小局愈分愈多則愈不足以成事尊處以費絀而止豈亦窺見斯義耶礮子翻沙手錡包鉛或尙可用但不能速且多耳各處協餉少解海防亦因之核減蒙固何辭惟歎血未乾遽寒前盟恐無解於失信之愆聞兩生擬辭南洋半餉雖彌謙彌僞亦知協項之有名無實而朝廷徒責鐵路電線之成惜鄙人於元年秋冬未做此高一著入題文字耳鑄洋之議就目下時勢揆之窒礙殊多有王者起埽除一切弊政必來取法朱季雲回省屬其稟明閣下往勸樂平煤礦辦法鄙意實爲江興利非以貽害幸勿

再有阻撓日來由東局至敝署電線置妥僅費數百金通信立刻往復卽用局內學生司之神奇可詫各使均相道賀執事聞之將又啞然笑數百年後必有奉爲開山之祖矣振軒在時流中能虛心實心者吾力不足以推轂任其頽放缺然於懷

五月二十一日復丁兩生中丞

病狀似頗狼狽告旣不能痊愈況卽再四瀆告必不允行不如勿告四字有味乎其言之也聞與筱翁近相水乳諸事或易通商餉源日絀各省皆然閩力兼顧臺防更形竭蹶似祇有通籌力所能爲者與院司要約明白如期撥解日國船案經唐景星同廈門領事議有端倪諒可辦結德國巴使近因總署照覆數語不協幡然出京鴻章力爲調停亦就轉圜頃已由津北旋俄土戰爭方始日本內亂甚長似臺防目前必不可無事各營疲弱者遂漸裁汰但酌留精銳分守要隘專致力於鐵路電線開礦招墾等務

得尺得寸亦可大可久之計也三十六墩礮船當已至閩赫德本有留洋
弁二人教習之請春帆既經赴臺務祈執事察奪主裁應留洋弁及遴選
船主大二副等均飭吳惟允等妥辦是幸船名如何更易並乞示遵筠仙
來信欲就李丹崖所帶學生分習煤鐵礦務煉冶諸法及興脩鐵路電線
理法未知丹崖到後籌議若何既申明約章在先恐難中道變易然如埃
及派學生赴英學作火輪車路固當及早取法也景星經手招商輪船關
係重大未可久離今赴閩將日事辦妥殊於大局有裨望催其速回爲要
此間水雷學堂兼習電報諸童頗有進益昨將東局至敝署十六里內試
設電線需費數百元使閩粵學生司其事能用淺俗英語及繙出華文立
刻住復通信洵屬奇捷閩中學堂已散臺地電報將如何試造幸速籌辦
俾可逐漸推廣仲弢踰南下經此挫辱氣更靜斂春帆何時回廠
六月朔日復郭筠仙星使

西洋政教規模弟雖未至其地留心諮訪考究幾二十年亦略聞梗概自同治十三年海防議起鴻章卽瀝陳煤鐵礦必須開挖電線鐵路必應仿設各海口必應添洋學格致書館以造就人才其時文相目笑存之廷臣會議皆不置可否王孝鳳于蓮舫獨痛詆之曾紀是年冬底赴京叩謁梓宮謁晤恭邸極陳鐵路利益請先試造清江至京以便南北轉輸邸意亦以爲然謂無人敢主持復請其乘間爲兩宮言之渠謂兩宮亦不能定此大計從此遂絕口不談矣讀二月杪賜示各節崇論閎議洵足啓發愚蒙禁鴉片之大疏雖奉鈔寄各省籌覆寥寥數語毫不著力外間習爲固然尙未議及此間黎劉二道詳請先商英國禁止販運不得不照咨也度公之力亦未能使英商同心嚮善耳左帥新復吐魯番托克遜等城自謂南路折筮可下朝廷日盼捷書催協餉如星火更無以雅各刊投誠之說進者然將來勢必旋得旋失功不覆過尊論崇尙一切虛誕以

爲正義此類是也伊犁久據內外置勿深論俄人欲白占便宜繳價相累及黑龍江以東換地諸議似皆不行至開墾江浙荒土言官疆吏屢有條陳仍是空言無補停止各省釐捐西征海防及各處留防之軍日苦接濟不足卽明知其當停亦無能停之理惟兩生在臺灣建言須就地試造鐵路電線已奉 廷僚議准又以費絀中止內地若果議及必至羣起相攻尊諭欲令敝處開示 朝廷以使沛然不疑於其心天下必有起而應者何見推之過當耶去冬招商局收買旂昌輪船幼丹請撥各省官帑百萬再招商股百二十萬迄今半載華商無一入股可見民心之難齊鐵路爲費更巨民力自開何能集事鄙意鐵路須由開煤鐵做起與此大役而鐵尙需購自海外絕難告成目下鷄籠煤礦已有成效武穴池州均甫開局魏溫雲亦在寶慶衡州等處試采煤鐵但官紳禁用洋法機器終不得放手爲之凡此皆鄙人一手提倡其功效茫如捕風而文人學士動以崇尙

異端光怪陸離見責中國人心真有萬不可解者矣鑄造洋錢一節去夏赫德曾發是議滬上洋商復慫恿各國公使力言於總署請中國自鑄抵交關稅爲各關平色不準藉以畫一也總署飭交南北洋核議各關道多動色相爭恐洋稅暗中折耗聞幼丹亦不謂然頃劉芝田稟覆派員設局仿造未知果有成否其望礙最大者既經官鑄必准抵餉納錢糧關稅洋圖平色定有準數勢難格外浮收多算一切官吏平餘陋規壅淨將無以自立又不能別籌津貼此數百年積弊未易一日更新者也尊處先購置一套小機器開其端每套不過三千磅日製五千圓專敵洋人使不得制其輕重以網市利似爲計之得者俟英人得舉至華當屬唐景星安與籌議李丹崖帶學生至英法弟與閩江各帥會奏定案專指學習製造駕駛似未便遽改別圖原疏本請總署行知執事就近照料詎總署惜墨如金並未轉達茲補錄原奏奉咨冰案務乞隨事妥爲籌商兩生注意鐵甲船

再四疏陳勢難中輟鄙人職在主兵亦不得不考求兵法明知西洋暫無
搆畔之事然兵乃立國之要端欲舍此別圖其大者遠者亦斷不得一行
其志祇有盡其力所能爲而已俄土戰事新報勝負互見英若與師援土
望商令學生隨其兵船前往觀陣以長閱歷西班牙前因同治二年夾板
船在臺灣遭風被搶索賠聲稱調兵實無其事船案現將議結古巴章程
未定荔秋尙無起程之期馬格里粗率專擅准予自新心尙無他或仍量
材驅使雲生改派德使何時前往暇畔自可融釋巴使議脩約頗與總署
齟齬鴻章屢爲排解積不能平望密屬雲生至伯靈留意應對爲要

六月十三日復周筱棠京卿

寄示會議·穆宗升祔位次摺稿援引舊章增脩改飾事雖就簡禮貴因
時自係老成持重之見諸公持異議者大都借事逞才蹈禮家聚訟之譏
自古善繼善述立天下之大本者固自有在不必以虛文糜費爲尊顯地

也內地釐金一節堅持定見彼亦不得逞志惟巴使注意以添口爲體面非定要大孤山奉省吏治情竄又東溝通商必非高麗所願恐更啓小邦輕視之心蒙於此不敢不斤斤較量略抒管見以待當事之決擇而已沿海沿江皆無可再添口岸或允以吳淞起卸鄱陽自製小輪船拖帶如何阿恩德所云一二件者尙於大局無妨但幼丹以重價購鐵路而意在收回拆毀實不知其何心前兩項須由總署定斷不必謀之外間徒滋搖惑耳筠仙雖有呆氣而洋務確有見地不謂叢謗如此之甚若達官貴人皆引爲鑒戒中土必無振興之期日後更無自存之法可爲寒心杏生心力精覈而煤鐵礦務尙未得地招商輪船受擠卻可勉支辦事之難非局中莫喻其甘苦也俄人無意還伊犁筠仙謂與其議價贖回不如索價相繫此種新論所謂不合時宜者恐與贖皆不成交耳

六月十四日復沈幼丹制軍

鈔寄與何天爵往復節略照會準情酌理裁斷公明該會忿然而去果何所挾持耶此間美領事畢德格云何天爵赴甯後楊泰記家屬著人至美領事處願在滬議賠不論銀數多少祇求勿經官斷迨天爵所議無成轉悔赴甯之失計未知確否現請伊國判斷想西華由煙臺回京必另出波瀾但兩案皆允賠償已予以轉圜之地僅銀數尙有爭較合龍當不遠矣宋長慶二營仍令赴閩彼宋或可釋然淮商包完川鄂釐餉之說鄙意竊慮不甚可靠嚮嘗周歷楚蜀之間非但鄂民喜食川鹽蜀民之倚煎運爲生活者實不下億萬戶其勢斷難驟紮停釐後私鹽更賤梟販與土豪勾結到處灑賣若循舊例責地方以緝私直掩耳盜鈴而已家兄於此事持之頗堅蓋亦確有見地若尊處不少參活筆將來淮銷不旺包完仍是虛名川鄂固受實福卽准釐亦未能拯救也願公三思行之

七月五日復曾沅浦宮保

直境五六月久旱多蝗旱禾枯萎幸六月二十五二十九等日連獲甘澤
禾甦而蝗亦少減永定漳沱兩河迭報長水五六尺其來源皆在晉中計
轄疆得雨必普晚禾尙可補蒔否地方稍有生機否前截留二十萬金司
庫上忙所入諒足濟用目前似祇能擇最早最瘠之區量爲賑撫俟秋收
後再分別辦賑正深馳系本日欽奉 寄諭據溫洗馬奏稱晉省賑款請
借北洋海防經費一二十萬再籌歸款飭鴻章酌量情形咨照尊處等因
查海防額撥江浙釐項歲短甚鉅現存無幾幼丹兩生諸公商請定購鐵
甲船水雷等要件急切無款可籌似未便挪作別用然使貴境天久不雨
民不聊生又無坐視阡危不稍拯助之理除另備公牘咨請據實核覆外
將來如必須借撥約在十萬以內謹當竭力報効至指捐款籌還果否可
靠訂在何時抑或另有指撥之項乞詳示一一以便預爲部署彼此皆係
窮家度日不得不通盤打算諒蒙鑒原

七月十一日復何筱宋制軍

兩生久有退志鄙書每以鞠躬盡瘁相屬此次乞假三月回籍並無一函見告猶料朝廷未必放手昨閱邸鈔居然如願以償推測其由或因執事有爲奏准暫緩赴臺乃猶決意引退不如縱令還山之爲愈耶然尊處既疏請增給公費又代陳病狀所謂小心事友生者不是過矣廷議可釋仔肩兩生藉以養疴私計良得惟臺防無主持之人未免後顧多艱春帆貿然前途大有進退狼狽之象病臥臺郡想已霍然久未接書殊爲懸慮內意是否仍令春帆代辦抑責令執事與春翁妥商兩生何時起程恐其一去不返須另籌經久之方此後政恐大費蓋慮也兩生辦事認真見幾敏決是其長處近來多病煩躁更甚上年駐津共處數月見其性情無常神明躁擾斷難與人共事每加規諫不欲聽納而當軸咸知其才又不肯竟其用設早調國督免致閣下爲難而彼或可以久居也今則無

能挽回閩事臺事皆將屬望於執事之一身遣大投艱盤根錯節幸勉力爲之勿稍退阻爲盼李世兄蒙爲開復鐵梅師甚爲感謝袁厚庵之子年幼失學致染習氣惟厚庵殉難極苦尙賴隨時訓植俾克樹立三十六噸礮船與赫德續訂四隻有成議否土耳其鐵甲船李丹崖來信似非新式價值亦非便宜自應緩辦總署議覆兩生前辭南洋海防協餉仍執前奏解閩茲兩帥假旋臺防歸何處主裁各省向解北洋者正多觀望現屆七月劃解之期雖爲數無多應速咨行照辦望留意查詢示覆仲弢暫寓船廠春帆如何位置

七月十八日復郭筠仙星使

威使去秋欲調處哈什噶爾事總署轉致左公深不謂然今既收復吐托二城又訛傳喀酋自斃左公方以一分二釐五毫利息借英商五百萬金以圖進取豈更願受外人之調停聞有 廷寄令其通籌進取及善後全

局如何結束月餘尙未覆到彼所特一劉毅齋頃來書亟欲告退則前敵事勢掣肘可知縱能恢復無用之新疆而腹地脂膏逼削殆盡本年閩粵大水晉秦赤旱自江南北至直東飛蝗二千餘里內變若作岌岌可危杞憂實甚劉雲生何時赴德用夏變夷之見當漸融化鴻章嘗論出使外洋必須博學多識知大體而尤以通知西洋語言文字爲第一要義但目中所見實無此項人才前奉 寄諭飭令保薦至今未敢濫保一員僅與總署談過美使宜添派容純甫爲其熟悉洋情語言文字較荔秋差強但其漢文未深又不甚知大體亦是一病唐景星與純甫等耳黃子壽本無意用世與洋人應對周旋斷難入格洋文亦非五十許人所能精習張力臣通曉洋文則又遠不逮曾劼剛劼剛自謂能識洋字而不能作洋語若置之莊嶽數年必有突過僑輩者矣此次入 覲當得京卿 內意或留待他年替人亦非其願渠有奉寄一函附呈管收

七月二十六日復沈幼丹制軍

鄂鹽一事本非職分所應言以見愛之深不敢不効忠告尊意既謂成敗利鈍所不暇擇轉自悔其多口謹將來函鈔寄家兄酌核以後不復與聞矣兩生請假回籍居然邀准馬首誓不回頭將來臺防付託何人未知廷議若何趨嚮卓見恍然於林泉大非良策是打破後壁之論一瞑不視則非人力所能爲近時諸賢惟曾文正脩到恰好地位其餘福分皆所弗逮微聞上海機器局日就頽靡劫剛以四五品京堂候補雖不樂久居京師其心精力果能調令督辦該局否

中秋夜復吳春帆京卿

瘴鄉盛暑執事乃不辭勞瘁入山周巡從者半多物故尊體幸獲康全殆由精誠感召天神呵護兩生迭經據實奏聞意欲薦賢自代而潮陽既許放還撫篆未令接署真不解用意之所在矣目下臺防主持何人兩帥

既去卽 朝命未必能挽之使出後顧茫茫殊爲焦慮鐵甲船爲海防不可少之物李日兩監督與金登幹等向土耳其領事面議價值八十餘萬金稅司卽赫德所用之人似赫總稅司承攬減至六十六萬兩尙不可信無論船樣稍舊價值非廉現無脩船之陽與帶船之人何敢冒然定購兩帥疏稱奉天之大連灣溫州之南關可作鐵船陽尊函謂粵東新買之黃浦洋廠均屬合宜前與日意格談及新開船陽至省亦須百萬無財無人如何與辦管駕釐募洋員教練自無不可惟滬局固無能管帶者貴廠前後學堂恐亦難其選平日倚洋員教練臨事必守局外之規辭退此差是有船與無船等至購運之費養兵之費建陽之費統計非存銀三四百萬不足以舉事今海防協款指撥兩年僅百餘萬一旦允購則諸款立須湊手何以應之且以日本洋情而論該國大久保等主持國是務在睦鄰朝鮮葛爾尙不肯遽爾加兵從前臺灣之役係副島西鄉等挾薩司馬亂黨

爲之今薩島內亂漸定與爲休息更無遠圖我方遣使往駐聯絡維持一時何自開蚌況中華洋面萬里南北兼防無鐵甲船尚可各謀守口僅鐵甲一兩隻屆時既難兼顧又難收口轉恐立腳不住貽誚紛爭兩帥一再上疏必欲訂辦此鄙意期期不敢盡諾者也鐵脅試駛平穩快船俟日意格圖式覓來卽當仿造此等自應先事籌備雖不足戰尚可藉張虛聲總之中國於兵船一道造詣尙早須俟出洋生徒學有心得乃可放手爲之尤須經費湊集目前尙非其時尊意得毋笑其迂遠耶亨利馬梯尼鎗前屬劉蕪林與李丹崖詳細籌議曾鈔單寄惟允兄商辦亮蒙鑒閱似應函致丹崖定議核價若干再照匯三分之一以萬桿論閩省三千敵處應分七千須將槍式彈樣訂明乃可匯付礮船三四號脩改已齊是否駛赴澎湖合操抑令北來兩生欲請洋弁教練尙未定準四船無人統率久或懈弛乞代妥籌爲幸黎民新式水雷已到大沽月杪卽往勘驗如精利可用

卽擬定買

八月二十四日復周筱棠京卿

筠仙來信煙臺條款下印度部議蓋專就洋藥加釐言之釐尙不願加徵豈肯議禁種販彼既販運我仍征收稅釐又豈能嚴禁內地種烟與吸食無以示信於民筠仙謂由督撫責成各縣鄉士紳自行勸戒使人人鼓舞感動此在三代以上時或尙辦到今世之士習民情非幾句空話所能感動筠翁曾爲粵撫與鄉紳當自量力乃竟忘之殊不可解喀酋已伏冥誅左相擬於八月進兵冀可漸次得手惟聞喀酋之子嗣位投誠於俄不知有無變態如何結束筠翁請訂中外交涉律法及核減各處領事薪費總署如何籌議何子崧過津適森有禮來謁瀝陳日本各口不宜遽設領事尤不便自行管束華民恐於兩國陸誼有碍經弟峻詞駁斥然察度情形口衆我寡恐有未便操切者已密屬子崧到彼後相機妥辦勿致因此決

裂爲要令姪孟與委辦礦務其志趣篤實當有成效穆春巖都護與敝處有舊應不掣肘又得星垣儀部照拂更卜攸往咸宜孟與於化學未精但將礦石寄館試煉可知其成色分數較有把握卽用縣長秀英文雖不甚熟人頗明晰昨已咨請總署核覆留津差委俟准行再附奏也仲韜在閩局已派差使近頗能看書習字筠仙與劉雲生極不相能雲生宜速赴德爲安

八月二十七日復曾劄剛京卿

船廠煤鐵小事一委員職分不應借重名卿出都之說友朋旣無踴之者似宜靜候放缺再商進止前緘幼丹與敝處會調請執事督辦滬局亦是藉名外出之意機局費紕事冗無可展布昨聞恭邸詢及吳桐雲具以實對尊意本非所願卽幼公允諾兄亦尙待躊躇現未得金陵覆信桐雲引對後如奉 簡用或將督操輪船併歸一手經理名目較重耶此節幼意

若以爲然大才若肯俯就則鄙人必當隨時越俎商辦不令執事爲難姑存是說以待機會私冀早得一缺再辭都門否則如吳春帆以府尹開缺辦船政二年尙不能輪補京堂亦覺索然無味矣昨接兩生函回籍後不欲再出閩撫尙易覓人臺防斷難整頓未知樞中夾袋有勝任愉快者否模稜世界全講資格恐誤事不小耳栗弟分發何部尙蒙齒謝轉增汗慙瀛眷過明春後想須結伴北上皖湘各信早經馳遞舍季弟函告擬卽派船赴湘迎接日來爲晉省賑飢極費經營仍無濟助

八月二十八日復曾沅浦宮保

京官湊捐晉賑晉紳亦屢上疏樞中有曾任晉撫者固無不知尊處苦況此次加撥四十萬晉得二十八萬又蒙恩分撥江北漕米四萬石天心仁愛冀可感召和甘九月內若得透雨麥可全種人心少定冬賑亦較易措手矣昨已咨詢倉帥截留糧船何日由通回津似宜由津運至保定

起早赴獲鹿再候台端派員來獲接運召民雲甫等前試運雜糧由泊頭
赴獲鹿旱道多百數十里鴻章謂其非計不若改行保正驛路爲便雲甫
續運平糶米五千石亦擬由保正往獲鹿也賑捐定章較滇黔捐章大遜
欲得官者皆就滇黔好善救濟之人則不論獎敘之有無厚薄然實心爲
善有幾人哉各省勸捐 內意諒無不允專勸晉中客籍仍賴地方官代
爲出力竊慮其緩不濟事耳樂山召民雲甫方議請敝處奏截招商局豫
辦來年江廣漕米十一萬石事多周折適 諭旨飭留江北漕糧未便再
三潰陳因以中止但望此四萬石早運早到折耗霉變必不能免冬臘內
可分給飢民一餐飽計已屬幸事其留辦賑糧之十四萬金除酌協江漕
運費外據丁黎諸君面稱仍代購運奉天雜糧數萬石連捐款儘力籌辦
惟本屆十月望河已凍封奉省新糧須封河後上市而價賤祇待來春開
凍運齊接濟春撫矣顯叔交卸後已否啓程其才實爲可惜渠固不願久

留若留辦賑運亦恐礙應弗靈獲鹿一帶接運尊意擬派何人此間司道欲請穎叔主持尙希核酌道府各員內如有廉正勤幹通權達變者自可勝任建侯六營可防內變冰橋結時秦中刀匪當已撲滅即使東渡無足畏也

九月三日復吳春帆京卿

回工就醫大疏立言婉約 批旨當不强令再行卽不卸肩亦免苛責凡事胸有主宰自不爲外物所撓奪當日若令執事暨權撫篆固是義不容辭今自有主之者奚須無權無餉之人混行撓越儻奉 詔敦迫儘可據實敷陳惟兩生旣決意投効一去不返彼帥才力斷難兼顧臺防狼藉一片竟無收束大局可虞部議指南洋經費接濟洵爲望梅止渴且令商借北洋存項尤屬乞醯與鄰 廷諭屢以晉豫荒旱飭借海防專餉又因金將軍欠俄糧價三十五萬金飭與鄂帥商撥涓滴之水到處分用涸可立

待時局之窮於斯極矣第三四號礮船蒙錫嘉名封河期近應緩俟明歲北來屈計前解之餉又將放盡廠內無便船到津無從搭解乞尊處覓爲籌墊隨後寄還兩生函稱四船管駕均非銳意向上之人必須雇覓英官精於鐵船者趕緊教導不至以有用變爲無用洵爲篤論前聞管駕三號兵官本領甚佳兩生諄屬赫德代訂頃該總稅司過津面稱其人奉英國委帶兵船不能分身且不願前來問其何以不願據云僅令教練而不假以節制黜陟之權弁兵必不聽令斷難進益卽如龍虎二船原募各教習皆已求退因兵官以下毫不虛心受教船礮機器久要廢壞云云所言雖未必盡確而張成邱寶仁等之無用兩生所見甚遠殊用焦慮萬分因與赫德約曰僮訪有英官精練熟手訂以教練名目管帶以下如不得力儘可隨時稟請撤換該總稅司唯唯而去窺其意仍不欲代顧也務望嚴諭張成等力求自強精進爲要弁目等運機操礮既尙未臻精熟虎威所留

教習及新船各教習一處合操是否可以通融分撥該教習願否悉聽卓裁妥辦水師人才淺薄如此幼丹兩生日催購鐵甲有船無人將焉所恃可爲太息直境大半歛收乃爲晉豫兼籌購運棉力何堪

九月六日復丁兩生中丞

昨赫德過津面詢前此尊處函託各件一臺灣至旂後鐵路需銀五六十萬兩已向麗如銀行商借利息約須八釐兄嫌其太重赫云俟議定再行裁覆若執事不出任事卽作罷論一所訂三十八噸礮船二號可照減價明年五月不能送到已由電信回絕一新購三四號礮船擬請英兵官教練該兵官已受英職斷不得來僅願教練而不予以節制弁目之權來亦無益一土耳其鐵甲船原議每號約二十萬磅今既另有人議價二十五萬餘磅政出多門必更奇貨可居伊亦不願經辦一衝協水雷尙未改定妥式亦無定價俟各國購有成式再行確探議辦據該總稅司稱在閩數

見閣下面貌精神甚佳祇腳腫不良於行此次手書又顛簸幾不成字回里靜養數月當易復元卽續請開缺未必奉 俞允也四船管駕均非銳意向上之人中國水師人才造詣實淺又不肯虛心求教而執事與幼丹屢屢大聲疾呼催購鐵甲原爲禦侮而設卽暫顧英官事急例應求去有船仍與無船等況海洋萬里一二隻鐵船何能兼顧終恐爲人所禽耳招商局兼併旗昌其議發自閣下而成於幼丹鄙見初不謂然亦以人才缺乏之故現太古怡和竭力傾擠船多停歇岌岌難支幼帥早置身事外尊論另派委員大爲整頓不知天下尙有何員最妥請酌擇見示前商請葉廷眷就近會辦堅拒不出稍妥者必不肯著手矣晉豫秦赤旱千餘里直境秋收大歉奉 命兼籌賑貸棉力何堪

九月十六日復沈幼丹制軍

鐵甲船自臺灣事起中外迭經議購迄無成局一由費絀一由無駕駛訓

練之人無脩理合式之陽雨生屢疏催購而於前三項並未著實措意棉力實不敢獨任至土耳其現船二隻李日兩監督會稟以爲可購每隻價銀二十五萬餘磅無可再減赫德昨過津晤談去冬願減至十六萬磅今春可二十萬磅日李驗過則增至二十五萬磅渠斷不肯經手愉快迷離殊莫測其意嚮而丹崖密函又瀝稱該船種種不合新式土國非無力給銀實欲另變新樣三年以來各省解到海防專款將及二百萬弟不敢濫用絲毫除開銷赫德所購礮船四號雜項外樞部迭次飭提現存約數購土船一隻購到後支用更繁自本年七月分解津閩各省關觀望尤甚近三月僅收二萬以後來源將竭何能作此豪舉非有貝之才與無貝之才輻輳並至外海水師恐難應手奏效尊意以爲何如滬局一事謹將來函鈔示劄剛茲得其覆書照鈔呈覽所慮七端確有遠慮第二條欲將二成內已抽之款籌復舊貫是否可行另增款項則恐無此財力第六條公費

月增八百金第七條兼轄輪船似亦可商其餘皆題中應有之義諸乞詳
加核奪如無窒礙卽挈鄙銜奏請否則存而不論彼此均無成見也粵人
伍廷芳精習英國律例及公法筠仙荔秋爭羅致之昨來謁晤恂恂有儒
士風雅不欲就外洋參贊因臧商總署請留南北洋差遣遇有疑難案件
俾與洋酋辨論凡折以中律而不服者卽以西律折之總署復臧深爲許
可屬會商尊處並筠老卽奏咨辦理召民詢商伍君歲須薪俸六千兩兼
令繙譯西例公法於交涉要件有裨請津滬兩關歲各籌給三千金南北
各口有事皆可前往襄助已屬召民轉商芝田祈卓裁核示爲荷晉豫赤
旱千里直境亦甚歉收北方專賴麥秋至今無雨麥未能種道殣相望盜
賊充斥冬春懼有內變焦悚莫名葉田師能於東南位置舉比否

九月十七日復曾沅浦宮保

部撥二十萬計已派員赴領此間代運江廣漕米五萬石據朱雲甫而稱

封河前可購運到津惟連日西北風甚狂各河本極淺涸加以烈風驅送
幾不能容小舟雖擬由保定泊頭兩路分運仍懼緩不濟事焦灼莫名吳
清卿太史好善之勇任事之勤突出僭輦現捐集賑糧數千石由衛河出
豫之道口登陸查探清化鎮至澤州平陽一帶路逕運腳是否合宜鄙意
竊揣自津保獲鹿入晉之糧僅能灌輸省南而韓侯嶺迤西各屬四面旱
荒無糧可購儻能由清化鎮運抵平陽腳價計與獲鹿相埒免再由太原
西運之艱似亦計之得者昨見邸鈔又勅撥東漕小米八萬石 皇恩
浩蕩遠近同欽山東有漕州縣大半瀕近黃河若溯流而上泛舟至清化
附近驟運入山大足救濟西南民命尊處奉文後諒已緘詢式巖中丞糧
石何時湊齊卽委員前往領運或再函屬清卿便道照料頃與議及渠亦
甚樂爲効力也閻丹初侍郎避地蒲州奉 特派查察賑務能否出預是
役此公清介絕倫各牧令聞風當更奮動張守人頗能幹獲鹿接運自必

勝任然山逕險遠費錢費力不問可知顧叔冤案得公爲之昭雪聞部覆甚難措詞冀以和解爲光復地步邊外馬賊鷓張樹軍無馬隊未足了之可不致蔓延否各省告幫之文必有起而應者但集捐解到恐在來年四月後矣

九月二十五日復曾沅浦宮保

鈔示各疏摺告示稿事理詳盡晉中官吏蹈常習故恐未見過此等手筆卽素習制藝小楷之儒林丈人或亦咋舌也此間所存晉款八萬兩一吸卽盡樂山召民皆能應變而不甚精覈江鄂五萬石卽使封河前到齊陸運獲鹿費已不貲由獲運晉需費尤巨貴省似無指項況加以東糧八萬石分路運費更非二三十萬不足濟事尊意請借東款適遇式嚴謹司筭筭出納之吝竊慮不能如數而各省捐項亦斷不能剋期湊用殊代焦灼東漕向例須二三月報齊未必能提早數月儻運費無措可否減商式翁

半折半本該省折價例定若干連運通費用在內計尙可觀小米原救晉
急如不可折似宜由黃河德州兩路分運或各四萬石或運獲鹿三萬運
清化鎮入西南各屬五萬石新裁酌大略派大員赴東體察情形相機妥
辦晉中如無結實可靠之員朱毅甫似可勝任惟渠甫經引見例應到
省應由尊處奏明暫緩赴鄂爲便願叔來談感恩知己當日若奏緩交卸
是大幫手也

十月朔日復沈幼丹制軍

總署聞招商局被太古擠跌勢將不支函詢如何設法維持尊處諒亦接
信已否具覆適月前朱唐徐三道在津會議倘有規模因據情酌核緘復
總署茲鈔來往函稿並節略二摺奉呈督覽董侍御所陳致虧兩端一置
船過多殆非得已遽行變置又恐中外流氓賃去減價相擠一用人太濫
生意行搖由其自擇本非官場所能過問至漕務各員薦人該局不敢堅

拒自有苦衷此等細故奚足毛舉其稱沿江沿海各口岸統歸局船攬載雖未分晰似與日本辦法略符漕糧加成則題中應有之義近年蘇漕撥運不及二成名爲體卹沙船實則運員別有私意聞英茂文本屆米色太壞擬明年多撥輪船而浙糧胡道欲大反如冠九之所爲下屆又擬少撥是不得不請 旨明定成數以免糧員藉詞需索剋扣庶可維持大局官款緩繳五年利息嫌其過久擬改三年後分年還本俾各省已發之項終歸有著尊意以爲當否現催樂山召民芝田等剋日查覆當卽具奏可否摺列執事大衙敬求迅速示遵近畿求雨稍足尙可種麥自保定西南至晉豫東徐數千里焦亢不能翻犁飢民蔽野填壑可憂甚大現屆立冬猶盼雪澤頗霽補種春麥否則不堪設想矣願叔去晉爲幸事而被議實非公道昨由津附輪舟往鄂云將赴金陵謁晤來函卽寄楚轉交

十月四日復郭筠仙欽使

美江輪船所失二函前已補鈔奉寄雲生種種舛戾殊出意外其於洋務素未究心而矜張夸詐傾陷兇悻尤可鄙笑若令使德久駐誠恐債事貽羞頃奉密寄鈔示大疏並垂詢丹崖是否勝任是中朝已洞燭其奸益信老成謀國之公不避嫌怨矣丹崖博聞強識具有深心再加歷練可備緩急之用內意似欲令接署德使弟上年函致總署商派管帶學生出洋監督亦謂藉儲他日使才茲當贊成是舉約數日內覆陳當有後命望尊處暫秘之勿宣雲生見在若何舉動卽果以日記寄總署或逕有條奏事件必不致爲所眩惑儻狂悖如故惟有理諭善遣勿露決裂貽笑外人是爲切禱昨見總署遣繙譯德文學生三人資國書搭船出洋日內計抵英倫應否囑令緩待若雲生已行將來丹崖接辦原調參贊繙譯各員想須酌量更置一切乞密爲指授斟酌妥辦丹崖局面略小資望亦淺但作事尙謹慎細密既爲我公推薦自必感激圖報謹受教令英法學

生仍可責令經理輪車往來商察較便日意格利心過重實難專任執事
日記一編初聞孫大爲不平逢人詆毀何君乃逢迎李景發言盈廷總
署懼而毀板謗者遂亦中止何疏未見底稿究不知其詳悠悠之口奚足
深論來示一切不願誠冀幸士夫一二人知之推類以及其餘此心泰然
更無顧念庸民覺世之苦衷可敬可佩英使一時竟無替人雖屢書乞病
總署必不見允蘭孫奉諱秋坪不過附會其議論並無真識定見從此政
府當無甚齟齬遇有要事仍不妨委婉上達也伍廷芳月前來津據稱不
願當二三等參贊荔秋亦不帶往惟於公法英律煞有探討其人亦尙穩
靜因與總署緘商尊疏酌定通商則例須先繙譯各國律例始可斟酌采
輯已由黎召民與伍廷芳議定暫留南北洋差遣歲給俸金專令繙譯英
例辨論交涉要件非敢奪公所好緣渠不欲遠行祇有量才器使勿任久
居香港爲外人牢籠耳兩生假旋無意再出臺灣諸務得人爲難西陲進

兵尙無捷報西北數千里旱災餉源日絀不知所以爲計

十月六日復吳春帆京卿

兩生回潮後消息常通否臺防責成何人旣無 明旨想猶待其復出再三展轉貽誤實多東洋一時不至生蚌琉球雖經罷貢 中朝尙無責言何子峩過津云奉 密寄查酌情形祇有暫置高關所見甚是彼以琉球爲藩封不欲他屬我以大度包之豈復有無故興兵之理但久後難保不覬覦生事耳南洋海防經費迭奉樞部核議分半解閩無可變更惟本年七月以後報解益稀若抵作臺餉正前臧所云望梅止渴也巡海快船昨接李丹崖八月初鈔示訪查單開有二種喫水均二十尺外似與中國港口不宜未知是否另有輕便之法至淺水礮船似甚合式僅行九海里半又嫌不快尊處擬仿造何種何時可以開辦果已定議則養此項船之費第當分任決不專累閩省張成督四船操練經台端申明約束能否虛心

求益頃晤駐津英兵官謂若延請水師出色之員來華教練須由駐英公使與外部兵部商辦必其國家允准乃可爲他國効用筠仙於此道素未究心將來如必訂請或託丹崖留意筠翁參奏劉雲生不勝德使之任畢丹崖代之鄙意以船廠赴英法學生仍須丹崖兼理以專責成不日當有廷旨飭尊處轉行知照三國相距甚近輪車來往便速望馳函丹崖勿得推諉爲幸四船經費已飭解二萬金交招商局滙寄矣秋後久旱麥多未種西北數省饑荒禍變將不可測焦灼莫名

十月十二日復曾沅浦宮保

部款二十萬計已起解冬賑當可趕及霜風戒寒無衣無食之苦卽難遽得大批糧石先以銀錢分給稍慰民望雲甫由滬鎮購運米麥至今始運去二萬數千石聞多在獲鹿存積未卜何時到晉至江廣五萬封河前雖必可到齊轉運入晉恐須拖至年外語云千里齎糧士有饑色今不止千

里又隔山險望梅不能止渴焦慮莫名清卿帶雜糧七千石及漕米數千分起由南運河前去日來豫境土壩開通河水長六七寸冀可趕至楚望道口一帶會商豫員潘辛芝觀察設法運往清化鎮尊處已札飭澤屬各州縣派人迎護又咨商清卿酌辦想清卿抵豫察度情形必有確信屆時似須委員赴清化設局料理耳現因清河淺涸保定一路已不能開運衛河封凍較遲樂山等擬續運江廣漕糧仍由包頭赴獲邯鄲東陽關一路目前尙無運事應備來春分運東漕蓋江廣爲數無多已由獲鹿清化兩路似不必再走東陽關多一路則多一路之局費迭次咨函旣蒙俯鑒續請江廣六萬石部議是否允行借東款添鹽捐各節 廷旨已否飭遵外省能否照辦均深盼系承屬派樂山赴東商領漕米鴻章固義無可辭樂山亦責不容諉惟諗知東漕須來年二三月始能齊備卽提早亦須開正借款則 廷寄一到文李等必有定見非旁人所能慙慮速去旣恐無大

益而封河期近鴻章卽須回省此間營務處尙有兩吳道一請假回籍一運漕赴豫地方營務交涉專賴樂山經理彈壓卽晉糧捐局亦多由樂山主政急切萬難分身頃召民亦來懇留請仍由晉揀派得力之員赴東作秦庭之泣似較親切有味敬希卓裁朱翼甫部照巴轉咨家兄請作爲到省或無庸 奏留也

十月二十一日復沈幼丹制軍

鐵甲船本應定購惟南北洋面萬餘里一旦有警僅得一二船恐不足以往來扼剿或有失利該船不能進口必先爲敵人所獲轉貽笑於天下卽僅以一鐵甲扼大沽海面以他船附之亦慮立腳不穩進退失據弟每懸想海上戰事輒用危心至尊意縮其尺寸以就閩滬之塢鐵甲至小者喫水必一丈六七尺以上滬塢固不能進閩塢亦未必能容另闢船塢則需巨款爲購一船創建一塢旣無指項亦覺不值李丹崖等瀕行時曾屬其

考究新式斟酌得宜再行繪圖訂價來商並察酌出洋學習生徒果能駕
駛脩理確有把握無待求助於人卽議定辦正與尊恡略同此事端賴執
事與兩生復出合力圖維分任其責鄙人精神才力實不堪此艱鉅也劾
剛所議仍是另增款項爲最難至補缺一層原非外間所可爲力祇聲敘
而已春帆至今未補蓋由三品候補者多係 樞廷出使兩途船政既非
清要又非遠差固應居後非有意抑置也四五品缺較多或內或外終可
換補渠係外行過慮之言其懼入總署不知章京如周筱棠吳憲吟皆實
缺四品卿屈令同列則劾剛不願升諸堂上則周吳不願卽沈董諸公亦
不願也初引篤仙入署已不免上下牴牾必擠去之而後已豈肯再招生
手耶劾剛才氣挺邁京官勢難久居外省亦難俯就將來不得已恐仍不
免出使耳承示杏蓀請嚴查商局附船一節杏蓀等前晤談屢以爲唐徐
咎秋間唐徐在津曾經面詰長江內早有此船以小敵大旗昌太古頗受

其害旗昌併後本局大船又被侵占然腳價一跌則無不跌擬伊等僉稱近甚虧本願歸局股收買作爲公船現已定議杏臻固未得知至江楚采運漕米贏餘前數年係六股均分本屆米貴虧短又當五股分賠局外議論皆未甚悉底蘊局中如唐徐朱近均和衷惟杏臻多齟齬亦久不與聞局務矣前復總署書旋得復函鈔閱內江內河不通商口岸一層明知總署與南中當事必不謂然姑妄言之既多疑慮疏中當參活筆或竟罷論卓裁以爲何如昨交英道賚去一函蘇漕可卽照議

十月二十二日復吳春帆京卿

臺軍進紮後山八月杪阿棉社之挫添兵助剿能否深入獲利屬撥洋火箭已飭劉蕪林撥借貳百枝交梁守備由輪船運同此物燒山驚敵頗有威勢但每戰所用無多宜儲度高燥屋內勿任潮濕爲要鐵甲船一項幼丹兩生來函催辦頃幼帥復稱土耳其之船既不合用可另定製新式者

生徒隨廠學習船成而學亦成將來可備駕駛脩理之用能否縮其尺寸以就閩滬船塢隨時脩整等語與鄙意所籌及去秋面屬日李兩監督之語略符前接丹崖八月初鈔單內有云中國購此船以甲厚十二寸入水十七尺爲率參以英廠新制寬以時日俟多考數船定購較有把握其入水十七尺者閩塢能否拖進脩理望查明見示如再縮小恐鐵甲更薄礙位更小便不中用如以十七尺爲率閩滬各塢皆不能脩理爲購一二船於海外另建船塢又不合算務乞熟籌全局精思博考臧商丹崖等妥晰核辦敝處海防存款約可訂購一船其餘應請幼帥主持或兩生再出時籌議矣總署函詢丹崖何時丁憂何時服闋弟未據稟報有案姑以服闋期近並商明出洋後權宜頂帶復之或亦有函詢尊處似恐簡署公使或有望礙故至今未見明文其實丹崖使德較雲生必更稱職奚爲拘此小節耶晉中賑糧運費太重撥款捐項不濟籌畫維艱召民等請借閩廠

輪船於開河後北來運載亮蒙允行弟擬多月初回省直境賑撫亦難掘一空矣

十月二十四日復會沅浦宮保

江鄂五萬石雲甫等湊購雜糧起運日內計可如數祇要獲鹿運晉腳價有著驟駄應手臘月或可分給各屬昨接東糧道專員資函稟知一切殊爲焦急式嚴擬定借銀十萬奚足濟事今再代懇撥足東漕八萬運費所謂無聊極思不得已而求其次也候東省復到准增運費再如尊命檄派樂山前往與崧道會籌辦理蓋一離主人翁不但呼應不靈必且款項無措也儻東省不肯多借樂山萬不敢承充此役鴻章準於月初回省此間留伊坐鎮吳道督兌江北漕約計歲杪可回則營務料理有人樂山可於年內外赴東商辦矣朱毅甫極言四天門險賊車運不便又東天門補鑿費力須窮年累月數十萬巨款姑令就便勸議而已

十月二十八日復曾沅甫宮保

部款二十萬日來當起解在途未准部文殊爲焦系此項早到冬賑可早分撥獲鹿存糧亦得分批趕運東省僅借十萬與此間所料適符式帥應已出奏如未覆陳接鄙函或稍加增然至多恐不踰二十萬式翁手筆最緊況渠與采臣皆昔年不甚得意之人與尊府不甚關切儻敝處代陳仍一毛不拔東糧八萬實在不敢過問應由吾丈會同丹翁頂奏以東款運東糧名正言順 朝廷必可允行丹丈據稚璜山中之語入告更爲確證樂山在津勢難遽離姪回省後不可一日無人尊意俟丹翁 奏調人員令其分任是役最爲得力丹翁功德在東屬吏尙多呼應必靈務祈卓裁兩淮鹽捐多少當不至落空亦未必剋期濟急蘇糧道英茂文謂江安道庫有閒款四萬可請酌提助購晉糧前已函商幼帥未知可行與否清卿函稱分糧數千石由館陶運蘇曹鎮東陽關一路河已凍封由泊頭轉撥

未知能否趕及直省並無截留晉糧之說脩武飢民滋事清卿必能探明前進也丹翁已否出省廉正剛毅與執事氣誼投合忭慰莫名

十一月二日復榮侍郎

敵處查辦本省災區賑撫事宜兼籌晉豫轉運賑糧才殫力微實已日不暇給徒因何編修奏請京畿民食維艱亟應招商運糧入京平糶不得不兼顧根本且奉 旨已在九月杪封河在邇南中購運勢不能多仍飭局員朱道其昂等趕緊設法現計河凍以前已由輪船陸續運津米糧五六萬石以備陸運赴京不料事雜言龐張侍御謬稱委員私買京倉是聲影俱無而亦妄吠足令任事者寒心惟既經奏辦在先似未便計較局外浮言因而中止業飭商局在事各員倍加審慎將來憚守回京一切遲速辦法悉令稟求指示務祈推愛切實照料斟酌萬全曷任拜禱憚守以尊意神機營添設機器局屬由弟派員襄助查津局得力人員無多現有久在

滬局之升用知府華蘅芳精通機器製造堪以委任屆時酌量咨調亦可
十一月四日復郭筠仙星使

船政學生十二員蒙諮商外部均收入各船及廠局學習三年後冀有成
就能駕駛自購鐵甲船回國確有把握庶不虛此行矣幼丹兩生催購鐵
甲船甚力擬屬李丹崖密爲考究酌擇新式喫水淺者不得過一丈六七
尺令生徒隨廠學習船成而學亦成將來卽委管帶回國望轉屬妥辦爲
幸瑞典刑罰監獄會卽使往觀勢難盡廢數千年老例咸與維新法國明
年三月大會執事可就近挈隨員與會總署派赫德招商運貨前往聞頗
可觀藉拓眼界前覆議德使一疏奉 旨交該衙門議奏昨接密函以業
經頒給 國書列有銜名若忽撤回恐外人亦疑更調太易應俟雲生咨
報赴德遞 國書後再奏請撤回等因雲生何時起程計其到彼咨報須
明春三四月到京停留長智尙未知有無變態細閱自陳大疏情詞哀迫

深爲惻然但慮樞中不易措詞或且置之高閣疏內未請銷差卽請亦難
邀准仍祈耐煩忍辱鎮靜處之以後此等文字可以不作聞樞譯友人均
嫌尊處條陳過多直道之不行久矣晉豫秦直旱災極廣弟代籌糧賑費
盡氣力而無所補救可憂甚大

十一月十二日復丁稚璜宮保

手示敬審蓋躬篤祐綱紀振新極經營慘澹之思具摧陷廓清之力每讀
大疏拜倒至地秦晉豫荒旱異常而晉災尤重且廣四面糧路不通沅帥
諄請代籌奚敢稍分畛域惟畿疆著名瘠苦自河間保定西至大順廣一
帶秋收極歉麥多未種亟須分別賑撫羅掘已空踰太行之險運糧一石
成本須七兩餘自秋徂冬百計圖維僅運去賑糶雜糧七萬餘石尙不知
何時抵晉無解於日斃千人之厄負疚莫名丹初先生清介堅苦牽拉出
山方倚借撥東款三十萬購糧濟急式帥僅九十萬尙不敷轉運東漕八

萬之費更不能分給丹翁若我公在東必不忍坐視溝壑而不爲援手也
淮軍向恃蘇省爲命脈近因稅釐收數過絀幼帥雖關顧大局而解額大
減勢非得已每年八九關竟放不出南北海防賴此支持又不敢大加裁
減不得不乞憐於執事茲蒙飭解三萬楊枝一滴大有噓枯起生之機又
承金諾年底必解足六萬兩明年諸事就理當加增一二批足徵患難交
情至相關切三軍拜德萬衆騰驩鄙人惟日引領西望慈雲之遠茁耳明
知尊處協撥繁多入不敷出猶爲此不情之瀆惶愧奚涯黔滇鹽務整頓
新章委用得人定卜日有起色借撥東省三十萬聞亦未能如數鄂中爲
金軍俄糧巨款無措無以應命係屬實情諒荷俯鑒洋款須奏明由總署
轉飭海關作保彼族始能應承部署請公久以此懸之禁律況左帥新借
利息增至一分二釐尤不成事無論何處再借利不肯減晉豫之災議者
欲借洋債又復中止樵堅似難爲力惟議改既改必須成本籌足一氣呵

成未知東鹽餘利存項能否借濟幼帥遵照部議停止濟楚家兄已專疏
瀝陳請緩俟黔滇銷暢自是正辦望執事合力堅持之甯遠越嶺必有五
金佳鑛官爲試辦需費無多幸早籌及此間現派員分辦灤州開平煤鐵
鑛順德及張家口外銀鉛鑛二三年後冀有成效蓋中土窮極無聊非從
地產討生活別無開源之術也洋員分往西藏越嶺探路逕經大力設
法勸阻藉伐其謀以後當無妄想江北廳教案儘可摩盪使就範圍法多
內衅其會長皆務息事范若瑟貪慾無從大逞自使車四出各國氣餒少
平要挾亦少從容鎮靜庶可日久相安弟於冬月初九由津旋省諸托順
平

十一月十三日復曾沅浦宮保

兩宮憫念晉災無如 樞廷手筆過緊於尊處請江廣漕則交部議借東
款則令其斟酌辦理毫不助勁司農又挾昭雪顧叔前案徵嫌議駁江廣

今再頂奏或可仰邀 特旨耶中朝大官老於事詎肯感激徒媮媮古今
同慨難訐庭守汾州時不收節壽糾察屬吏至嚴竟可爲天下清官第一
因彼湘嫉忌華渾力弱不能扶持掛冠而去昨奉 奏調過保老當益壯
雖迂拘不免而刑名一道素所究心大足矜式浮靡爲台端得人賀據稱
謁恭邸諄屬勿再請款可自由外間設法可謂不諒人只各省窮極本無
多方可設 內廷不予以財又不予以言則更有呼少應近江浙鄂雖略
有報捐者涓滴之惠曷有濟於倒懸式嚴奏咨十萬之說似已牢不可破
崧道進省稟商恐亦未能請益彼既將東糧船運道口距直已遠鴻章絲
毫無可爲力祇有籲請吾丈會商丹叟或派張聽庵王鼎臣前往接收轉
運爲便專以十萬金運至澤州一帶或可勉敷清卿已至道口未接續報
彼湘冰如均已去位未知接手何人豫事固甚擾攘秦晉爲患亦大左公
方揚威萬里外不顧其後思之悚然

復李子和河帥

豫中歲饑不登道殣相望執事空拳赤手奉命查賑固知無可設施頃聞倚重實勞兼權撫篆雖駕輕而就熟實遺大以投艱邇來徧歷災區得信應旋節省垣部署一切矣朗軒交卸展覲始可履新計在明歲夏秋之交冬春賑撫端賴長才江北漕米四萬石早抵濟縣如驗收迅速就近分撥各屬究可救活民命若干來春又有東漕八萬接濟聊資補苴昨朱曼伯面稱尊意擬借洋款此須由總署關道作保彼族方可允行事多周折且左公創爲利息一分二釐他處不能再減正恐不易籌還彼午侍郎有借華商百萬之說亦虛毫無把握彼兄幫辦未卜踴躍成行否晉災太廣而糧無運路丹沅兩公竭蹶經費棉力媿難多助吳清卿運糧過境飭屬協同照料爲感

十一月十四日復文式巖中丞

沅翁請借六十萬係惑於從前東庫富有之說不知今昔情形不同卽丹翁亦以爲仍是去任時庫藏也惟東漕八萬實非十萬兩所能運到此外亦無可籌撥不得不瀆求台端蒙允添五萬尙不知承辦者能否踴躍現咨商丹沅二公或由晉另派大員前來會同子蕃籌辦如晉中無人可派樂山亦義不容辭屆時當令趨謁稟承壹是至丹翁此次強起急難聞頗指望尊處如數籌借有一請再請之說儻荷格外設法移緩就急於三萬外添籌一倍免致饒舌亦省許多筆墨弟非敢爲竭歡盡忠之舉緣彼此皆係至交非大才大力不能解此紛耳子和同年兼署豫撫難保不再續請明年江北河運停辦十字河工可緩催呼將伯之助似應將前項九萬改撥來春豫賑亦惠而不費之道想尊意亦熟籌及之

長至日復熱河延都護

此間練餉本無盈餘近年災歉頻仍地方工賑各事無可籌畫往往移緩

就急通融挪用今歲晉豫奇災賴 朝廷發帑截漕直省旱雖微輕而報
災者六十餘州縣不敢再請部款致煩 聖廩賑撫所需業將津省庫款
羅掘一空並提用練餉五萬金現軍口食正虛不敷接濟此後無論何處
告幫斷斷不能應允惟執事屬精圖治講求軍實近在同舟未忍重拂其
意姑以分濟一萬之說竭力兼營尙希體念時艱就餉額以籌兵額庶免
後累

十一月二十日復船政吳春帆京卿

兩帥請開缺疏奉 批旨展假三月卽馳回本任倚畀甚殷堅辭不獲諒
可不待假滿力疾遄行巡海快船圖樣寄到閩槽恐不能勝尙須另脩船
陽需費有無指項如可擇地另造或兼豫備能進一丈七八尺之鐵甲船
免致將來議購時有船無陽另起爐灶乞大才通盤籌畫爲幸所慮丹崖
不便兼德使五端深謀卓見良足欽佩他國調署西洋向有此例德法雖

有猜嫌然德尙有駐法之使何至疑及外人總署擬埃雲生到德遞 國書後再請撤回屆時丹崖應已服闋且署使無須覲見以上各節均無窒礙惟兼顧肄業一層似未甚便然德法英輪車輪船往返不過數日德使交涉公事無多當可按季按月分身查察鄙意日後果奉明文應仍奏明令其兼充監督差使或請其自擇幫辦一員在英法常川照料似不必在數萬里外代籌替人或恐志趣未能盡合筠老前疏已以英國學生自任望便中再與兩帥密籌之美國黎約翰水雷前經驗試嫌其力微僅駛來往中國四里零已令退去今丹崖信稱懷台脫魚雷亦係力微行緩可知此道甚難英人馬克登那新製水礮果在六洋里內可以命中是可在水內行十八里一切機器造法實價二萬八千四百五十磅合洋銀十四萬二千餘元合同注明不另售亞細亞洲別國卽添購洋鋼及加工料價在外似尙合算既請筠翁驗試屬實儘可訂購此專備海防之用彼帥函稱

南洋經費有解交福建藩庫者新商明筱帥挪動兌匯俟兩帥復出時弟再與商議由南北洋專款內各認一半則衆擎易舉矣

十一月二十二日復兼署豫撫李子和河帥

海內之窮非一處矣左帥所借洋款五百萬分攤各省關以應解額餉陸續抵扣諸當事皆有借洋人逼命之慮內廷亦視爲畏途筱翁允由本省釐金雜稅歸還百萬即使可靠以後十年用度將從何出筱陽請借商款由錢漕正項認利分償以後京協各餉又從何出鴻章竊疑皆非大農所願聞也豫中東南各屬略有收成似未便一律停征張宋等軍及練兵要餉或須在本省設法其他可省者暫從節縮以待年豐至賑款則儘已撥漕糧及各處借項均勻分濟辦災無定額亦無止境盡心焉而已公值此艱虞知必煞費經營鴻章同病相憐無能助力分憂實深慙赧十字河工鄙見以爲可緩移緩就急在執事之一言淮粵捐款非咄嗟可集也

十一月二十四日致閩丹初侍郎

自丙寅冬間通問後想望風采忽忽十餘年每念時事日艱若長者彊起應召必有起衰振敝之功偶在朝右與當軸歷數並世人才僉推執事如翔鸞威鳳可企而不可及今三晉彫瘵至此迺舉吾丈於草莽之中畀以督查之責迭讀大疏幅幅流民圖輒爲掩袂屑涕沅翁請假山左六十萬勢非得已無如東庫經數任揮霍情形大不如昔穉璜兄所稱未知果合前後事勘驗實在否式翁謹司筭籥前允十萬似嫌過少鴻章從旁復竭誠推挽翼稍助執事艱危於萬一頃得復書錄呈沅帥欲全數撥至尊處或多運購兩萬石之糧直境荒歉亦甚德薄召殃疚心曷已

十一月二十五日復沈幼丹制軍

招商局事芝田查覆甚爲詳切召民亦略有議論頃已參酌各稟與前致總署函意敘摺覆陳敬列台銜容卽咨呈不通商口岸一節鄙意原注在

內湖內河各省官輪船隨便往來向無禁忌今若另爲商局開一門逕立法嚴密無甚流弊他日當有餘力能造淺水小輪船似更活潑總署旣疑慮多端執事亦不甚謂然雖芝田稟內曾及此層已遵示作爲罷論第於夾片承運官物內引伸及之英茂文已允添撥蘇漕但恐後來活動不得不就此定案尙乞鑒原至辦事在和尤在專一語名論不磨至爲欽佩在事五人本極一時之選各有短長景星初尙專壹自兩生招令入閩後漸涉紛鶩兩年以來局事最爲紛拏徐兩之獨力搯掙艱苦萬狀而粵人性復不受諫諍同事多與齟齬然無兩之則已傾覆昨來津辭差未敢遽允並催令景星回南襄助此次旣奏定章程以後無論何人坐辦祇要照章清理浮議當可漸息向例辦公專靠五分用費似無從另籌優餉或俟有贏餘年終倍給酬勞耳掛名祇盛杏蓀朱毅甫儻再求退可否聽其自去免致意見歧出風浪暗生各員晉謁時務懇嚴切提撕爲幸敝處前購

船四隻彼宋來函請暫留臺防若兩生復出未必遽肯放手承屬提款另購兩號亦不敢辭明春赴津後商定再行報命筠仙心緒煩懣口不擇言殊堪憐念前緘勸以此等文字後可不作未知肯采納否直晉豫災區迄未得大雪來春更無生機蒿日時艱日切危懼蘇守厲精圖治甚有風力吳中寄來風謠三十絕語多刺譏神情固不甚順能吏亦宜保全未審曾達執事之聽否敢以鈔呈能否設法調停之

十二月八日復陳俊臣廉訪

礦務之興利勝於勸捐抽釐一語破的近人泥古不化有礙風水則士民迂見易激難散則官場套語實皆不思不學而已式帥過津時席間略與談及似尙格格不入蓋閱歷中外世故過深隨聲附和不能爲驚俗創獲之舉執事既深求利害灼然不疑新方伯余紫垣在黔欲興礦而未能者將來必可同心合力左右贊襄以冀山左數千年未發之地寶一旦捷足

先得免致外人覬覦雖縣煤產甚佳以疏通運道爲要策辦一處須與一處異議自息推廣較易吾宗去臘密陳之件殊太唐突究亦因之中傷公論在人幸勿退阻

十二月十三日復閩丹初侍郎

連奉手教仁心厚德真氣至誠流溢於楮墨間所處時地之窮鴻章未能効毫末之助夙夜愧疚迺蒙長者獎藉逾分惶悚無地東省續撥運費五萬本與沅丈約一埃解直卽轉解台端應用嗣未准撥解明文適王鼎丞赴東稟求增益恐無可再增卽留此項添補來春東漕道口以上之費昨又臧商沅丈如本地捐項有餘卽先酌撥抵解儻晉中無從撥抵當請沅老另籌他項必不落空周口采買先有五萬應急隨買隨運當可陸續指用也海內困窮已極理財又難得其人尙不知咸同初年氣象晉豫如此奇災論理應發帑數百萬拯救民命而內外庫儲俱竭部款固無可請卽

江浙閩粵川楚財賦素雄者今皆寅支卯糧毫無儲積沅丈借撥各省僅五萬猶以捐項作抵竊慮未盡照辦至捐項取之商富近來口岸愈添生意愈淡華商本利俱微僉知晉人相食樂於爲善或多力不從心敝處募捐報數約十餘萬以之購運賑糧僅兩三萬石徧地餓莩從何採起吾丈空拳赤手其竭蹶更當何如清卿運抵清化之糧祇有萬一千石除撥翼城二千石外其餘盡給鳳臺陽城急切尙不能入災民之口明春江鄂東漕十四萬石盤旋山谷計需數月乃到人壽幾何豈能緩待眞焦急無法也聞豫境餓斃亦衆子和筱午二公欲借洋債旣被部駁欲借華商又無成數時向敝處籌商直境荒歉之餘秋麥未種冬雪未降來年春夏不知是何景象非有數十萬金接濟必爲晉豫之續記從前兵劫叢中無此危迫實不仁而竊高位階之厲耳

十二月十四日復桂司馬本誠張大令彭齡

來贖牛斗高粱石約銀三兩一錢零小米石約銀五兩四錢零當經批令俟價低收買計登籤照日來苦寒地凍糧車暢行價或減落又值歲暮糧戶急需錢用發賣必多想已趁此時儘數收買矣本年晉豫直旱區太廣各處糧價皆昂兼之北數省多雪不大春收難望商販乘間居奇固在意料之中竊慮營口糧價仍不大跌約計理堂兄賚去銀兩除已購運高粱萬石外所餘僅能再購牛斗兩萬餘石仍不敷直屬春撫之入冬以後各屬間有得雪二三寸無濟於事其未得雪未種麥者居多來歲青黃不接之際如何過活焦急莫名封河後兌運無路聞錦州牛莊等處囤戶可以先給定銀照市價預訂購糧石若干望兩兄妥爲設法如臘正市值稍減卽多訂購三萬石如年內外得雪卽多訂一二萬石約高粱七成帶穀粟米三成如行戶不甚相信或請景觀察代爲擔保俟開河後照數匯兌或解交決不至誤至招商局輪船運費既昂開春承運浙蘇江廣漕米亦

難周轉前已咨調閩廠官輪三隻於二月間北駛陸續赴營運載煤價較省僮購糧稍多尙恐展轉誤時該處各口是否有民船及外洋夾板船可以攬載望預爲籌度多多益善僂計營口開凍須二月初十內外再由津分運州縣已三四月之交矣晉捐有成數否以後開報糧價卽折算制錢可也

十二月二十二日致洪觀察

梓芳兄聞已假旋奉諱其差使已否另派接辦抑俟百日後再議弟前托代請教讀師一節適梓芳先期回皖不及與謀茲更爲執事詳述之緣經方經述兩兒隨侍津署正做畢業工夫現請先生抱病南歸因留京公車率多根底淺薄不能靜坐盡心講授述兒年甫十五資質聰穎詩文字論皆有可造惟性情浮躁尤須名師循循善誘進之於道竊念所素知者如楊孝廉長年章編脩洪鈞品學兼粹於鴻章有文字之知素相關切楊君

年老子幼未知能否遠離章君前爲臧託裕中丞位置書院聞已訂穎州一席亦未知舍彼就此否擬求閣下速爲探詢如肯俯就歲脩約三百金以外來往川資另送僮二君皆未能北行執事頗年教育寒畯人才輩出意中果有如前兩君之學問品行其文字又合時尙靜坐善教毫無外務者卽爲酌量推薦二月開河後商請搭輪船赴津其品學未兼優教讀未得法者幸勿徇情濫舉弟公亢山積不暇自課兒學此事關係極重叨在心交用敢奉託伏乞費神酌擇見示爲感